

Biogr. 4

88

4^o Prog. 00

MARTINI ANTONII
DEL-RIO

E SOCIETATE IESV

LL. Lic. S. Th. Doctoris

VITA

Breui Commentariolo expressa.



ANTVERPIAE,
EX OFFICINA PLANTINIANA,
Apud Ioannem Moretum.

CLD. LDC. IX.

MARTINI ANTONII
DEL-RIO

E SOCIETATE IESV

LL. Lic. S. Th. Doctoris

VITA

Præf. Commentariis explicat.

BIBLIOTHECA
REGIA
MONACENSIS.



ANTVERPIÆ,
EX OFFICINA PLANTINIANA,
Apud Joannem Moretum.
MDC. IX.

Perquam Reuerendo Nobiliqꝫ Domino

IOANNI DEL-RIO

S. R. E. PROTONOTARIO

ET

D. MARIAE APVD ATVATICOS

DECANO.



VMQVAM tam male cum rebus humanis agitur, vt VIRTUTIS neminem teneat admiratio; præsertim quando inuidiæ pruinam decoxit, post mortem serenior. Nec fuit, nec erit æuum tam litterarum iners, & sterile; quo non laudentur boni. *Placet enim, Romani Philosophi iudicio, sumpte naturâ: adeoqꝫ gratiosa VIRTUS est, ut insitum sit etiam malis probare meliora.* Addo rei-

publicæ incolumitati conducere pluri-
 mum, eam non celari. *Non sine ratione*, eius-
 dem sententiâ, *sacra est magnarum virtutum*
memoria, & esse plures bonos iuvat, si gratia bono-
rum non cum ipsis cadat. Quid verò minus
 gratiarum possumus rependere, quàm
 meminisse? Huc cogitationem inten-
 dens amicus quidam meus, MARTI-
 NI ANTONII DELRIO vitam com-
 plexus breui Commentariolo, arbitrio
 meo commisit, typis vti mandari cura-
 rem. Nec consultandum diutius iudi-
 caui, nec premenda istius viri gesta, quem
 si quis norit, * *Ταῖς ὁμοίαις τῷ Θεῷ διαφέροντι* af-
 fuisse dixerit. Nec ardua magis delibe-
 ratio, cui mittendum hoc schedium: ad
 te ibat sponte, & quasi proprium pete-
 bat larem. Te enim non solum eadem
 maiorum imagines, & stemmatum im-
 plexa series ipsi coniunxit arctissimè; sed
 VIRTUS etiam & DOCTRINA. Hac
 ille

* Familia-
 ribus Deo
 affectioni-
 bus.

ille bigâ ad cælum euectus est, hac eodem proueheris. Norunt ea, qui te non ignorant. Quare multis nihil opus est. DELRIVS ad DELRIVM venit, non hospitij simplici iure, sed cõgnationis: eruditus eruditum reuisit, quasi à mortuis re-
dux; religioni addictum, religiosus quondam. Eum suscipe, & quâ soles beneuolentiâ complectere, ac familiari domesticoque huic splendori pectoris tui fores aperi; nósque inter tuos habe, merito tuo, affectu nostro. Vale.

Adm. R^{de} Dⁿⁱ V^{ra}

deuotus cliens

Hermannus Lange-veltius.



MICE LECTOR, Nos hic viri virtutem expressimus potius, quàm illustria Maiorum nomina; maturum & amicum cuique fructum legimus verius, quàm altè latèque sparsam refodimus radicem. Nempe suo quæque colore gemma placet; non quæ alieno ornamento, et si aureo, occultitur potius quàm oculatur. Quod si quis vetusta DELRIORVM monumenta quarat, non ab auis tantum, atavis, tritavis, quorum stirps sobolesq; variis apud REGES CATHOLICOS munitis etiam inter sacros Equitum Ordines inclaruit; sed à faculis aliquot retrofioribus, PELAGII Regis aliorumq; auspiciis, cum in Catholico exercitu duces ipsi contra Mauros fortiter fecere; habet ille in Regis Salamantica archiviis memoriales tabulas, vetustâ membranâ conspicuas, quibus non unus DELRIO rebus præclarè pro DEO, pro ECCLESIA, pro REGE suo gestis intexitur. Nostri quoque mater (ne LOPEZIANO in varias familias sparso nomine ambiguus hereas) è VILLANOVANIS fuit. quæ gens, virtute fideq; inter Aragonum primos spectabilis semper eminuit. Sed hac externa, ut dixi, nec in censum viri suo peculio diuitis referenda. Tute hominem inspicere, LECTOR; dices alienâ faculâ non egere, cui tam illustris rectè factorum Sol splendet domi. Cuius radij duo hi in Vitâ præteriti: D. Althelmi Ænigmata, quæ Moguntia typis dedit, cum Gratium tenderet: & Commentarius litteralis in Threnos Ieremiæ, qui, eodem quo Pharus S. Scripturæ tempore, orbi illuxit.

C E N S V R A.

Hæc R. P. MARTINI DEL-RIO descriptio
est exemplaris, vt meritò in multorum exem-
plum imprimi possit. 13. Kal. Aprilis, 1609.

*Egbertus Spitholdius Plebanus,
librorum Censor.*

S V M M A P R I V I L E G I I.

ALBERTI & ISABELLÆ CLARÆ EVGE-
NIAE Archiducum Austriae, Ducum Bur-
gundiae, Brabantiae, &c. Serenissimorum Bel-
gicae Principum, Priuilegio cautum est; nequis
*Martini Antonij Del-rio e Societate IESV Vitam bre-
ui Commentariolo expressam*, præter voluntatem
Ioannis Moreti, Typographi Antuerpiensis,
intra sexennium imprimat, aut alibi excusam
in inferioris Germaniae ditiones importet,
venalémve habeat. Qui secùs faxit, confisca-
tione librorum, & alia graui poena mulctabi-
tur: vti latius patet in litteris datis Bruxellæ,
VI. Aprilis, M. DC. IX.

Signat.

Buschere.

E R R A T V M.

Pag 41. lin. 28 C. Iulij. lege C. Liuij.

D. GREGOR. in X. MATTH.

MORS IUSTORVM bonis est in ADIV-
TORIVM; malis in TESTIMONIVM;
vt inde peruersi sine excusatione per-
eant, vnde electi exemplum capiunt,
vt viuant.

MAR-

1.

MARTINI ANTONII DEL-RIO

E SOCIETATE IESV VITA.



MARCO Varroni non tantum ius ima-
ginis ob curules maiorum magistra-
tus propagare, sed ob singularem
scientiæ sapientiæque laudem, aliud
quoddam, & augustius concessum
est. Illius enim, *in Bibliothecâ*, <sup>Plin. lib. 7.
cap. 30.</sup> *quæ*
prima in Vrbe ab Asinio Pollione ex manubiis publicata
Romæ est, vnius viuentis posita imago est. Idem, non eo-
dem, sed potiori tibi iure debetur, MARTINE DELRI:
quem iisdem verbis compellarem, quibus **πολυγραφία*. <sup>* plurimo-
rum scri-
ptorem.
Epist. lib.
13. epist. 18.
Acad. qua-
stion. lib. 1.</sup>
Varronem Cicero quondam, nisi plura te ac diuinio-
ra quædam, quàm profanum illum, legisse ac didicisse
scripta tua docerent & gesta. Itaque, dum alij alibi vul-
tus tui fila ducent, & cælestis genij sacrum velut lara-
rium omnibus venerandum proponent, dum inter illu-
stres viros vel cælo sculpent, vel colore pingent; ego ani-
mi mentisq; tuæ simulacrum, virtutes, inquam, doctri-
namque tuam, tenui graciliq; stylo, quasi gypso, defor-
mare conabor: magnos illos litterarum Principes obte-
stans, vt solido te metallo, in bibliothecis, hoc est, in me-
moriæ templis, auguratò consecrent dedicentque. Et erit

A

non-

nonnemo, vt arbitror, qui ex pedis vestigio totius corporis harmoniam, vt Hercules quondam Pythagoras, solerter modulabitur: aut vt Iouis Olympij Phidias, ex supercilio crinibusque obiter descriptis totam effigiem ingeniosè feliciterque perfectam exhibebit. Tu modò cælis nuper additum, vti benè speramus, sidus nouum ac salutare nobis exorere, & ignorationis noctem mitiga, vacillantemque manum benignus dirige.

PATER-
NUM GE-
NVS.

*In præfat.
Hieronymi
Delrij ad
Senecam
anno 1574.*

DElriorum gentem, in valle Burebâ, inter Castiliæ montes ortam, nobiliq̃ue stirpe olim effloruisse vetustissima Auorum monumenta testantur: quæ Segobiæ Burgisq̃ue à Maioribus augustè quondam dedicata. Eorum summa apud Hispaniarum Reges auctoritas cum eluxisset; nescio quâ Fortunæ procellâ languescentem, ad pristinum splendorem reuocarunt Ludouicus Delrius, Regis Consiliarius, libellorumque supplicum Magister, & Antonius Delrius, nostri huiusce Martini Antonij Delrij parens, Cleydaliæ & Artzelaræ in agro Antuerpiensi Toparcha. Qui opibus parem animum ostētans, in Merâ, spectatissimo illius vr̃bis loco, eas ædes construxit, quæ ob elegantiam atque amplitudinem Principibus dignam, Regibus Proregibusque nostris eò aduentantibus familiare Prætorium esse solent. Hunc vitæ suæ, & humanioris culturæ auctorem, grato, sed non assentante tamen calamo dilaudat, in præfatione Notis in Claudianum præfixâ: de eodem illud succinctè, sed memoriâ dignum posteritatis refert: Scio patri quondam meo, bono & laudato viro, vnius noctis peruigilio, & mortis metu, quoniam medicos conclamantes audierat, vix
tertio

*Tom. I.
Synag.*

tertio ætatis lustrò, planè capillos omnes canuisse. Euenerunt huiusmodi prodigiosè non paucis: quæ recensere, vel ad causam naturamque reuocare, eorum est, qui in Physicorum penetralia altius se immergunt.

Matrem non minùs illustrem nobilitatè habuit Eleonoram Lopeziam, matronam singularis castimonie, Aragonum proceribus oriundam: cuius maiores Cataliudæ magnificè tumulati; parentes verò Antuerpiæ apud Patres Carmelitas, in sacello Deiparæ, quod eorum munificentia & pietas splendide exstruxit, Optimatum more ius sepulcri posteris asseruerunt.

Ex hac semete Martinus cum primùm pullularet, spem segetis in herbâ significauit eximiam: nec postea elusit. Ipso pueritiæ exordio vegetum, acre, & non minùs strenuum emicare ingenium, ad litteras aptum, atq. incitatum: diuino quodam velut ictu ac impulsu ad ardua rapi, quæque honestiora essent, licet eadem difficiliora sectari: id agere vnice, quod ageret. Itaque parens optimus, cum natiuis scintillare radijs nobilem filij sui indolem animaduerneret, velut gemmam ad cotem exigebat, naturamque lacescebat, vt submicantem verecundè lucem magis accenderet, & in aliorum notitiam atque utilitatem, in familiæ suæ decus ac gloriam produceret: nulli parcebat sumptui, nulli labori: per se, per alios puerum monitis instruebat, præceptis erudiebat: atque ex Philosophorum consulto, non calcei tantam, quantam pedis ducebat rationem. Hanc filius in se curam & pietatem studiorum suorum primitijs testatam esse voluit, debitaque religione cultam. Vnde in Epistolâ ad Granuellanum, Solino dedicando conscriptâ, *Nimirum*, inquit,

GENVS
MATER-
NYM.

Anno Do-
mini 1550.

PVERTI-
TIAE EX-
ORDIVM.

magnopere mihi peccare viderer, cum Patrem nactus, quem non eo tantum nomine, quòd Pater, diligere debeo; sed quòd is Pater, qui nullis umquã curis aut sumptibus pepercit, ut me ad eruditionem morumq; sanctitatem vocaret. Neque hîc solùm: sed clariùs alibi & disertius, dum suas in Claudianum Notas paterno nomini, quasi bulam Laribus, suspendit; illius prudentiam, & animi sui gratitudinem, quosq; in studijs gradus fecerat, designare conatur. Primò igitur (verba ipsius sunt) Grammaticæ præceptis, Latina Græcâq; lingua principijs haustis, me ad Poëtarum, Historiæ, & Oratorum assiduam lectionem contuli. His, ut aliarum Philosophiæ partium, sic Moralis potissimum ediscenda laborem addidi. Idq; tuâ, Pater observande (à quo non primum dumtaxat in naturam aditum, sed etiam in litteras ipsas, atque religionis & omnis doctrinæ cognitionem, primaquæque exordia accipi) ope, consilio. Hæc, quæ commemoravit, tam multa, tamque inter se dissita, ingenio studioque complexus est, eâ ætate, quâ plerique inter nutricum vbera nondum omnino lallare desierunt; tum verò religiosi legum adytis successit, cùm non pauci hoc vnum norunt, nucibus ius dicere.

De his, alijsque, antequam singillatim narrationem instituamus, non abs re fore iudicavi, eam, quam in stitendo observabat, rationem exponere; eo præsertim tempore, quo illis, quas recensui, disciplinis navavit operam: ne quis inficietur tam paucis annis tantum scientiarum atque artium consequi potuisse; & anilem me fabulam texere, non Veritati facere, incuset.

Solet ille, tum etiam cùm necdum pubertatis annos

atti-

attigisset, ipso diei crepusculo, postquam rei diuinæ interfuerat, intinctum vino panem modicè sumere; deinde subito in cubiculum se illatebrare, quod ei seu bibliotheca, seu * τεχνοφυτάριον quoddam erat. Hic sellam & pluteum subiectis rotis ita fabrefieri curauerat, ut leui pedis impulsu, per omnia circum pulpita ac loculamenta, se ipsum omnemq. studiorum supellectilem circumueheret: illi cum insedisset, non prius inde dimouebatur, quam adultâ nocte, tempus & familiaris ephebus ad cœnam, non rarò inuitum ac reluctantem, cogeret. Eâ igitur contumaci quodammodò assiduitate tot omnium scientiarum Auctores euoluit, ut Henricus Zebertus Dunghæus S. T. Doctor & librorum Censor testetur, in Aduersarijs, quæ annorum nouemdecim Senecæ illustrândo dedit, *plus* ^{In censurâ suâ.} *minus mille & centum variorum Auctorum in diuersis scientijs & linguis sententias maximo cum labore & iudicio conscribi ac dirigi, ut ad eos enûmerandos doctissimis quibusque nomenclatore opus esset. Quare vir clarissimus Iustus Lipsius fateri interdum non erubuit, numquam se legisse, numquam vidisse, ac omnino nescire an sint Scriptores, quos non paucos illud xvi nostri miraculum (sic eum nominabat) ad testimonium dicendum citare solet.*

Huc accedit, non eum, ut multis hoc tempore usu receptum est, Calliphanem apud Athenæum imitatum fuisse, qui ἀρχὰς ποιημάτων πολλῶν ἐκγραψάμενος, ἀνειλήθει μέχρι τριῶν καὶ τεσσαρῶν σίχων, πολυμαθείας δόξαν προσποιέμενος: *poëmatum multorum initia descripta, ad tres usque vel quatuor versus continenter recitabat, multiplicitis doctrinæ laudem affectans*: nec sola tantum libro-

rum nomina, quod nouelli litteratuli faciunt, bibliopola potius quam studiosi munus obeuntes, citasse, non indices voluisse atque expilasse; sed cum Scriptorem arripuisset, non ante dimittebat, quam attentè atque integrè perlegisset, & quæcumque in capedunculas litterarum sui thesauri referenda iudicasset, ea scitè ac venustè descripsisset: atque hoc modo plus vice simplici omnia Tostari volumina pressò, non suspensò vestigio percurrit, & sedulò perlustrauit. Videant hîc adolescentes, quibus generosior sanguis ad gloriæ virtutisque regiam anhelat, vberissimo cuique ingenio culturam adhibendam esse: nec Atheniensium illud * μέγα πνεῖν sufficere; verum ad summa adspiranti; magna esse conanda, magna agenda. Nunc ad temporum ac gestorum seriem reuertamur.

* magna
anhelare.

STVDIO-
RVM PRI-
MORDIA.

Primum ipsius studium Grammaticæ præcepta, Græcæ, Latinæque linguæ principia haurire. Hæc inter fascias adhuc, puerilesque delicias, Liræ (Brabantiæ id oppidum est) viuaci ingenio, tenacissimaque memoriâ tam enixè comprehendit, vt neminem hoc sæculo plura ex Latinis Grammaticis, ceterisque eiusdem linguæ Auctoribus, magis meditatè, magis castigatè vsurpassè commentarentur illius in publicum emissæ commentationes: quas dictionum locutionumque Romanarum vernaculo quodam succo scaterè nemo negauerit, cuicumque leuiter saltem Tiberim gustare contigerit. Quin imò niuium se Egeriæ fontibus proluisse videtur iis, qui interioris notæ dictiones locutionesque numquam delibauerunt; quosque, Calepinum vt circumferrent, hortabatur, si benè dicentem vellent intelligere. Græco, Latinoque idio-

LINGVA-
RVM COG-
NITIO.

mati

mati Hebraïcum adiunxit, cùm Sacrarum litterarum cognitio id postulare: Chaldaïcum non omnino ignorasse scio; familiariter vsurpasse nescio. Flandricè, Hispanicè, Italicè, Gallicè, Germanicè, ita loquebatur, vt in plerisque eloquentissimus, in nullo hospes esset. Poëtarum, Oratorum, Historicorumque scripta omnia, quaecumque in quibuscumque Belgiæ bibliothecis reperiri poterant, euoluerat, excusseratque.

In Philosophiâ Magistrum habuit Parisiis Ioannem Maldonatum, virum felicitis sempiternæq. memoriæ, supraq. omnes maritimarum canicularum, & informium monstrorum, nuperas antiquasque furias, animo & virtute celsiorem. Hunc sedulò constanterque docentem audiuit; peculiari necessitudine eam sibi Philosophiæ partem deuinciens, quæ de moribus differit: quam virtutum omnium parentem ac nutricem à Socrate laudatam & excultam nouerat; quamque viro ad remp. gerendam nato præcipuè semper venerandam intelligebat. Ex eadem ille animus, sui compos, recti tenax: quem toto vitæ spatio tam pugnaciter conseruauit; vt eum nihil, nisi ex rationis iudicio aggredi; ab eo, quod aggressus erat, non nisi ex eiusdem rationis arbitrio digredi, facile esset curiosius obseruantibus intueri. Nusquam inanes querelæ, & vanæ lamentationes: quæ minabantur aduersa, vel excipere & tolerare fortiter, vel prudenter euitare: errare, hominis esse dicebat; sapientis, errata corrigere.

Post Philosophicas exercitationes Duacum ad Iurisprudentiæ studium se contulit. Ea tum Academia Philippi II. Hispaniarum Regis auspiciis nuper inaugurata erat, eaque de causâ, vel vt tanto beneficio cum iucundâ in

in posteritatem recordatione fruerentur, vel vt Regis fauorem sibi conciliarent, cuius maiestatem in approbando hoc illius opere amplificare videbantur, nobiles non pauci ad illud oppidum commigrabant. Hos inter, vt diximus, Delrius fuit: cui tum morum ac studiorum Moderator Ludouicus Carrio, vir ingenio & scriptis clarus.

VERECUN-
DIA ADO-
LESCEN-
TIS.

* asini ca-
put, aut
suis corha-
bent.

Eluxit sub idem tempus adolescentis castimonia, in re, quæ iudicio quorundam, quibus Circes pharmaca pestiferâ quadam sanie perenniter stillante oculos obduxerunt, parua videbitur; nec magis eam scdam esse iudicabunt, quàm sus lutum: ij verò, quibus libera ab istis nebulis mentis nitescit acies, & nondum * *ὄντ κεφαλὴν ἢ τοὺς καρδίαν ἔχουσι*, non irreligiosum integritatis augurium amplectentur. Cùm in eodem contubernio vir illustris degeret, qui post diurnas diuturnasque computationes nocturnis terroribus atrociter quateretur, ex conscientiae metu, quæ hominem minùs frugi secretiùs sine arbitris & interpellatoribus acriusq. stimulare, sapiùs ille Martinum, pro suâ auctoritate, mitiùs seueriusque vrgebat, vt sine vllo pudicitiae periculo (quod procul abesse videbatur) eodem in cubili somnum caperet, præsidio (vt censebat) aut solatio futurus. At verò adolescens ingenuus numquam adduci potuit, vel illâ animorum conciliatriculâ nobilitate, vel potentiâ nocendi auidâ, vel blanditiis vel minis, vt eodem, adolescens cum viro, in lecto decumberet. Nimirum etiam vbi discrimen nullum esset, *Verecundiam Iuuentutis tutissimam satellitem* à se nusquam abire patiebatur.

Duaco Louanium se contulit: vbi Cornelij Valerij disci-

disciplinâ, & Iusti Lipsij familiaritate, summos in litteris progressus fecit: præcipuam tamen diei partem legum iurisque scientiæ seponēbat: quod in operibus id temporis ab se elaboratis non semel palam esse voluit.

In epistolâ
ad Gran-
nell.

In epistolâ
ad Paren-
tem.

NOTAE IN
SOLINVM.

Primum ingenij sui foetum in lucem emisit anno 1571. dum quinque necdum Olympiades compleuisset. Is fuit *Solinus*: quem ex manu scriptis Iusti Lipsij membranis correxit, & Notis illustrauit, atque adiectis ad finem Cornelij Valerij Animaduersionibus perpoliuit. Factum, meo iudicio, id ætatis temerarium, nisi solius Del-rij factum esset; quem & diligentia & eruditio, & cælestis quidam genius vulgo exemit. Quod nemo inficiās ierit, cui & conatus, & rei successus non ignotus est. Illa sanè modestia ipsius incredibilis, quam in fine allocutio- nis, quâ Lectorem comiter compellauit, quamque in alijs deinde scriptis solenne velut carmen præfari solet, silentio præteriri non debet: Porro, inquit, *unum est, quod à vobis impetrare cupio, & debeo; scilicet, ut ante- quam de operâ meâ sententiam feratis, recordemini eorum, quæ Romanorum eruditissimus Varro in lege Ma- niâ scripsit, neq. in bonâ segete nullum esse spicuum ma- lum, neq. in malâ non aliquod bonum. meminertis quo- que me de grege hominum esse, e quibus nemo tam prouidus ac circumspectus est, qui non sæpenumero fortiter in lapidem impingat; eumq. hominem qui extra terminos adolescentiæ nondum sit progressus, cuius maxime pro- pria est iudicij non magnitudo, sed imbecillitas ætatis.*

Quantum ille ab eorum arrogantia & proteruita absit, qui cum in vitium labuntur, si quis Mercurius aurem vellicet, si quis ad viam reuocet, fungos, caudices, matu-

las loquuntur; & catapultas ac ballistas conuiciorum, in eos qui benignissimè consulunt, eiulantur, furijs & intemperijs acti: nec hederà quidem suos thyrsos velare student, nudis bacchantur armis, sed æruginatis: ut tum se maximè ineptiarum inficetiarumque coarguant, dum propugnare moliantur.

NOTAE IN
CLAUDIA-
NUM.

Post *Solinum* anno 1572. doctissimas in *Claudianum* *Notas* euulgauit, easque Parenti suo inscripsit, & in præfatione omnem studiorum suorum usque ad eum diem rationem reddidit.

Ex præfat.
in *Aduer-*
saria.

ADVERSA-
RIA IN SE-
NECAM.

Carus ante alios Poëtas Seneca ipsi erat, hunc in vlnis gerebat, in sinu fouebat: eius, propter summam sententiarum gravitatem & copiam, lectione mirificè capiebatur, quem dum voluere ac versare non desinit, & quandoque cum scriptis codicibus, atque multarum linguarum scriptoribus eum confert, quasi per satyras, ut aliud ex alio incidebat, multa ei apponit: Nota illa (quas prius adscripserat) ut sit adhibita pleniore quorundam locorum tractatione, in *Commentariorum iustum panè volumen* excreuerunt. Hastamen apud se retinebat, nec commeatum dabat, donec fraterna frasis, an caritas, manibus eius extorsit opus, iam erumpere gestiens. Itaque in *Senecam Aduersaria*, quæ decimo nono ætatis anno perfecerat, fraternâ industriâ prodierunt, cum vigesimum quartum ageret, & apud bonos plausum meruerunt: fuere tamen qui verso pollice malignius premerent, quorum tum scripta verso stylo supprimi debuissent. Ita fit: cum crescentem alterius gloriam famæ suæ luminibus obstruere vident inuidi & ambitiosi Herostrati, euertere ac demoliri student. Sic magna semper liuori obiecta sunt.

Neque

Neque Delrioni nostro adeò læua sui natura fuit, vt à philauriâ, communi pestiferoq. malo, iudiciij sui integritatem violari sineret. quare annis maturior hanc prolem resumpfit, & relambit; atque omnes illius artus tam modulatè conformauit, tam robustè exaggerauit, vt nullo iam repteendi possit, nisi fortè quid nimis. Accipite ab illo huius facti rationem: *Quæ olim panè puero exciderunt Aduersaria, recognoui tantum; & quas illis iudiciij, ingenij, & doctrina infirmitas, vel feruor ætatis lubricæ maculas adsperserat, seuerâ spongiâ & retractatione sustuli, deleui; Fabij consilio, D. Augustini exemplo.* Hac editione & correctione, aliud, quasi alio lustrali die, operi iterum in lucem prodeunti nomen indidit, & *Syntagma Tragediæ Latinæ* vocari voluit: in eodemque, mirum quam opportunè, Christianæ doctrinæ adyta claudentes, & quasi improbissimâ gentilitatis egerie fidei sacra-
 • ria altius obstruentes, stoam iterum aperientes, & barbâ ac pallio improbam frontem ac mentem inumbrantes, generosè compescuit. Fuit enim vir ille veritatis & religionis acerrimus vindex, voce ac stylo egregiè armatus, ac velut in procinctu semper ad Dei honorem, ad Ecclesiæ maiestatem vindicandam.

*Præfat. in
Syntag.*

SYNTAG-
MA TRA-
GOEDIÆ
LATINÆ.

Anno cld. Id. LXX. Louanij primam in iure lauream
 • incredibili omnium admiratione decerpfit. Quid verò
 admirandum? Omnes tum legum ac iuris consultos,
 omnes eorum interpretes euoluerat; vt prodigio sanè &
 ostento simile sit, vel ipsa sola Auctorum nomina memi-
 nisse, quos in Epistolâ ad parentem suum se perlegisse
 commonstrat. Fuit, si quispiam alijs (quod de Catone
 Marcus Tullius) librorum belluo.

FIT BAC-
CAL.

In exordio
Repetit.

Aliquot interiectis annis Salmanticam profectus est: quæ Academia, cum ceteris omnibus totius orbis nobilitate, studiis, magnitudine, frequentia, & religione pugnat. Huc cum peruenisset, non solum, quæ Louanij didicerat, memoriaque complexus erat, ne effugerent, reuocare sapius; verum, acerrimos in hac palæstrâ antagonistas nactus ubi esset, seipsum acrius incitare, omnes animi vires consciscere; nec quietem aut otium capere, donec aliis celsior assurgeret, & post varias atrocissimasque de iure contentiones, laureâ donaretur. *Repetitionem* (sic appellant) quam de more in amplissimo confessu instituit, *L. Transigere, C. de transactionibus*, diem videre iussit, nec incomitatam tamen: adiuncta fuit *Exercitatio ad L. contractus. 23. de diuersis regulis Iuris antiqui, totam culpa præstandæ materiam comprehendens: accesserunt summaria, numeri & quæstiones diuersæ*: item, de principiis iuris libri duo. Quod illius opus quisquis legerit, non septem Græciæ sapientum, sed omnium Iurisperitorum symbolum spectare sibi videbitur: nec à scholis rudem, sed post plurimos annos huic studio insumptos rude donatum, in tantillâ ætate quæret, in tantâ doctrinâ reperiet.

MAGI-
STRATUS
AB EO
GESTI.

IVRISCI-
VILISMI-
SCELLA-
NEA.

Post hæc in Belgium redux, in supremum Brabantiae senatum, à Philippo Rege II. cooptatus est. In quo Magistratu dum versatur integerrimè, ingens opus congeffit operæque ingentis, quod *Miscellanea scriptorum vniuersi Iuris civilis* appellauit; quod propter singularem doctrinæ copiam, eximiamque præstantiam, Petrus Brofsæus auxit atque illustrauit, iterumque typis credidit Lugduni anno cld. lcc. & cld. lcci.

Itaque

Itaque probitate & doctrinâ sublimiùs euehitur, & à Rege, Palatinis militibusque ius dicere iubetur anno cld. Id. lxxvii. Quo in gradu non diu substitit; sed anno insequenti Brabantiae, pro Cancellario, Regioque fisco praeficitur. Tanta in auctoritate, peccandi que licentiâ, illud sui Senecae assiduus animo voluere,

Minimum decet libère, cui multum licet.

nulli obesse; prodesse multis; nusquam à lineâ decedere, nusquam ad Euripos exorbitare; non suum emolumentum spectare, sed publicum. Quare in caecis illis nubibus ac procellis reip. hoc velut astrum non pauci respectantes, fortunarum suarum naufragium euitarunt. Horum è numero Iustus Lipsius; quem iam olim ex honestissimâ litterarum societate, morumque similitudine contractâ necessitudo Delrioni nostro arctiùs deuinxerat. Cum enim inuictissimus Imperator Ioannes Austrius apud Gemblacum acerbissimâ clade perduelles fudisset fugassetque, & miles victoriâ elatus in Louanienfium agro militari more & licentiâ grassaretur, multisque de causis Lipsij facultates ad exitium vocarentur; illius rebus Delrius consuluit: quâ integritate; ex Lipsio disce. *Mira, inquit, tua fides in me, mira pietas. amoris enim certè verbum leue est, in re, quam rari pro fratre fratres audeant, pro liberis parentes. Me, mea que absentis defendisti: & obiecisti te non molestiis solum, sed periculis, in hac flammâ rerum. Venisti ultro ad meos, erexisti, securos esse iussisti: hoc tantum questus, quod non indicassent. Itaque quod res opesque mea salua, quod scripta & libelli (id est, vita ipsa:) beneficium est unius tuum.* Et hic nempe est o Ιαπετος, quem tam crudeli formâ hostes depingunt; dum micissi-

*Epistolâ
râ Cent. i.
Epist. xlv.*

num clementissimumque virum, Eumenidum & Erinnyum laruis induunt; & iis nominibus dedecorare non verentur, quæ nec congruè satis affingantur Mezentio vel Phalaridi. Adeò fœda, adeò barbara sunt, quæ cõminiscuntur litterariæ atrocitatis & tyrannidis administri, nouique Perilli. In eo tamen rerum gerendarum tumultu, non tantum virtutis memor, sed litterarum satagens fuit. Sub idem enim tempus, vt erat omnium, quæ publicè quæque priuatim agerentur, pro dignitate & potestate suâ gnarus admodum, *de Belgarum seditione Commentarios* sibi Latinè concinnauit, Cæsaris in eo consilium æmulatus & industriam. Sed cum liberè, neque ad gratiam, non adulando, non supparasitando, vt hodie mos obtinet, eos libros contexuisset; tamdiu domi continere destinarat, donec, aut ij, quorum intererat, fato concessissent, aut ipsum Deus odio atque indignationi subtraxisset. Prodiere nihilo minùs Ibericâ linguâ Madriti, sub anagrammate Rolandi Natini Miritei.

COMMEN-
TARII
RERVM
BELG.

RELIGIO-
NEM SOC.
IESV IN-
GREDI-
TVR.

Iam in summo stare videbatur Delrius, iam inter ipsius fortunæ & honoris amplexus versari; cum in præcipiti se vacillare, & quò celsiorem, eò lubricum magis locum & abruptum premere intellexit: ex quo laberetur faciliùs, & post lapsum resurgeret difficiliùs: atque adeò, vt ibidem foret semper, numquam tamen sine periculo fore, numquam sine maximâ incredibiliq̃ molestiâ: magnas illas regiasq̃ cedros, in altissimis montibus nonnumquam quidem pubescere, aut interdum etiam senescere, numquam non ventis agitari: rarò sole foueri, sæpiùs aëris iniuriis obnoxias degere. Tandem igitur aliquando, vt Philosophus quondam, amicus sibi esse cœpit,

pit, imò Deo: sibi que consulere, Deo seruire decreuit. Nulla interim missionis spes affulgebat, nulla expediendi sese ratio; donec impetratâ ab Alexandro Farnesio Belgarum Prorege, prætextu nescio cuiusce rei, in Hispaniam profectio, post tam diuturnas bellorum tempestates cecinit classicum, & subduxit copias in tutum, præclaro & Antigoneo stratagemate non fugiens quidem, sed vtilitatem retrò positam insequens. Hic ille flexus in vitæ ipsius decursu, vbi non nihil subsistendum esse iudicauit.

Magnus hucusque, siue ingenium spectes, siue probitatem, siue totius ætæ vitæ integritatem: sed tum maximus esse cœpit, cum ambiit esse minimus. Talem eum cœlestis Philosophia reddidit, qualem olim Ioannem Damascenum; qui diuinâ quadam metempsychosi in Delirionem nostrum quodammodò commigravit. Fauete ô cælorum incolæ, & vobis benè volentibus, benignè adiuuantibus (nec enim inuidere potestis, nec liuere) hanc actionum vestrarum comparisonem ad examen vocare permittite.

DAMA-
SCENVM
IMITA-
TVR.

Generis nobilitatem, magistratuûmque, quibus perfuncti sunt, similitudinem non exponam: norunt ea singuli. Tria sunt, quibus in hanc morum affinitatem coierunt: Generosus, nec vmquam infractus in fidei dogmatis defendendis ardor & spiritus: Ardentissimus in Deiparam Virginem amor; quem cum lacte nutricis hauserunt, & tum magis etiam accenderunt, cum magni Imperatoris quasi prætoriani, tale sacramentum dixerunt, quo obstrictis, nec à statione discedere, nec latum quidem vnguem ab ipsius latere abiungi fas esset. Ea enim

enim est religionis vis, ut hominem à Deo per noxias deflectentem reuocet, & ad eiusdem voluntatem tam acutè religet, ut eadem debeat velle, eadem nolle: atque hoc est tertium, quod momentum habet maximum in hac comparationis trutinâ.

IN HÆ-
RETICOS
ARDOR.

A Damasceno contra Imperatoris iconoclastæ sceleratas tyrannicasque molitiones obiecta defensionum valla, & congestos argumentorum aggeres nemo ignorat. Delrionis contra hæreticos, eisdemque iconoclastas, omnibus passim Commentarijs ceruos, cippos, rupices, stimulos, omne genus, quæ affatim inspersit, adeò nemo ignorat vnus, ut non Hectorem Græci, non Achillem Troiani tam perniciosè formidarint, quàm Delrium Hæretici. Viderunt non pauci in familiari congressu coniunctique, quotiescumque homini, alioquin comi & humano, aliqua commemoratio vel leuissima eorum recordatio incidebat, toties ardere vultum, æstuarè animum, nihil aliud anhelare, quàm eos ad meliorem mentem reducere. Quod ubi desperaret, tum stylum stringere, ad cotem asperare; acutè, non diffiteor, & aculeatè contra eos dicere ac scribere, atque Patrum auctoritatibus, & Theologorum rationibus iugulum petere; non hominum, sed errorum. Id cum in omnibus ipsius lucubrationibus manifestum sit; tum illud adnotare licet, adeò religiosè Romanam Ecclesiam coluisse, ut illius semper iudicio libros sisteret, quoscumque, ab omni etiam periculi suspicione remotos, atque fidei Censuram arbitrio comprobatos, in hominum manus permisit exire. Vnum è multis dabo huiusmodi deuotionis carmen, quod in calce *Disquisit. Magicarum* scripsit. QVÆ-

CVMQVE

CVMQVE SCRIPSI; *ea cuncta S. A. & C.R. Ecclesia iudicio, & piorum Theologorum censura subijcio: si quid ignaro elapsum; quod Ecclesia minus probetur, improbo, damno, & pro non scripto haberi volo.* Idem necdum exactâ adolescentiâ in Senecam Aduersarijs adscripsit: idem alijs suis operibus. Ex quo proclive est æstimare nihil illi antiquius fuisse modestiâ & religione. Sic tamen, vt illam quodammodò secedere iuberet, nec omnino iuberet, cum huius causa ageretur: acer enim tum erat, vehemens atque incensus, & non plumbeo sed ferreo pugio- necernebat; hoc est, verbo dicam vnico, Damascenum imitabatur.

Alterum sacræ quasi pompæ ferculum, quam Da- AMOR ER-
GA D.V.
MARIAM. mascenus in Ecclesiâ instruxit splendidissime, Magnæ Matri, Magnæ Virgini debetur. Hanc enim tenerrimo quodam pietatis affectu, quasi melioris sibi vitæ parentem, coluit semper. Ex quo illud manus illi diuinitus restitutæ omnibus testatum gentibus, omnibus diffusum sæculis prodigium. Prodigium an Delrioni nostro à Dei Genitrice indultum fuerit cognoscere non potui; illud certè cognoscunt omnes, qui ipsius constantem, in hanc Reginam, ardentemque mentis impetum cognouerunt, non indignum fuisse, cui largior gratiæ, ætheriæque munificentiæ alueus ab illo fonte promanaret. Primas enim curas, quas in Theologiæ sacrariis publicæ vtilitati vigilauit, & quibus in eadem scientiâ famæ suæ sui que nominis aleam iecit, anno clō. Io. xcvii. eidem Virgini anathema consecrauit. Ex sunt *Florida Mariana*, in cuius operis fronte hanc epigraphen sculpsit, ære perenni vi-
duram:

D. MATRIS.

DEI GENITRICI SEMPER VIRGINI,
 MISERICORDIÆ MATRI,
 CÆLORVM, TERRÆ, MARIS REGINÆ,
 CATHOLICÆ ECCLESIE PROTECTRICI,
 HÆRESVM EXPVGNATRICI,
 VIRTVTVM CYNCTARVM SPECVLO,
 O. M. PATRONÆ,
 HOC DE COROLLIS MVLTICOLORIBVS
 SERTVM PANCARPIVM
 VOVIT, PANXIT, SOLVIT
 SERVVLVS MARTINVS DELRIVS,

ÆTATIS XLV.

ET SALVTIS HVMANÆ ANN. M. D. XCVI.

Aliquot post annis opus Marianum, non exiguum sanè volumen, omni scientiâ doctrinaque refertum, nulli mortalium addixit; sed huic vni Virgini, Epistolâ, velut sacrâ syngrophâ, id publicè professus illibatè iussit esse mancipatum: cuius operis vel ipsi tituli, quibus auctoratum prodiit, hanc præ se ferunt in Mariam amoris flammam:

SPECVLVM MARIANVM.

SPECVLVM PATIENTIÆ ET CARITATIS

IESV ET MARIÆ.

POLEMICA MARIANA.

& de quibus priùs differuimus, nunc iterùm prælo commissa,
 FLORIDA MARIANA.

Siue igitur togam, siue sagum indueret, pro MARIA, in agmine proficiscebatur, stabat in acie; aut pro eadem in Theologorum senatu sententiam dicebat grauissimè,

&

&cùm penes eum esset honorificentissimè decernebat.
Nec illo contentus magnæ operæ pretio; dictum à Salo-
mone præfago quondam spiritu cælesti Sponsæ epitha-
lamium explicare aggressus, & D. Virgini velut pecu-
lium quoddam conatus est vindicare. Loquitur illud
inscriptio:

ERVCTAVIT COR MEVM VERBVM BONVM

DE CASTIS NVPTIIS,

VBI SPONSVS AGNVS EST, SPONSA VIRGO PERMANET,

THALAMVS TEMPLVM, THRONVS ARA,

PARANYMPHVS ARCHANGELVS:

VBI PARTVS NON DEINTEGRAT:

VBI VIRGINITATIS LILIVM, FECVNDITATIS ROSA PVRPVRAT:

HOC QVIDQVID EST VERBI,

TIBI DEVS VERBVM,

A ME MINIMVM, SED A TE MAXIMVM,

MIHI CREDITVM, FIDE BONA RESTITVO;

TIBI TVVM DO, DICO, CONSEURO.

TE QVOQVE, VIRGO MATER,

COMPELLANS ORO, OBSEURO:

TV SPONSA SPONSARVM, HOC NVPTIALE MVNVS ADSPICE:

TV SERPENTIS ANNOSI CALCATRIX,

TV GENIMINVM EIVS PERPETVA TRIVMPHATRIX,

HOC TVERE, ET ME TVVM PROTEGE:

PROPHANOS HINC PROCVL PELLE,

PELLE IMPVROS,

PELLE PERFIDOS,

AMEN.

Multi hac ætate eximio quoddam nexu MARIAE ad-

dicti fuere : nullis tamen, aut vix vllus palàm adeò, fren-
dente licet Hæresi, notum vulgatumque voluit exhor-
tationibus ad studiosos institutis, aut scriptis accura-
tiùs libris. Quare si pristinæ nondum clementiæ oblita
est MARIA, quâ Damascenum quondam complexa fuit,
iam te quoque ô Del-rio, complectitur, & in cælesti tha-
lamo, mellirissimo de canticis osculo suauaiatur.

RELIGIO.

Tertium erat Religionis perpetuæ cultus : quem Pin-
tiæ (Vallisoletum hodie nuncupant) Del-rio in Societa-
tem IESV adscriptus, eximio dñini velut numinis ictus
iaculo inchoauit. Hic ille in Brabantie senatum allectus,
& eiusdem deinde Princeps, hic Palatinorum militum-
que iuri dicundo Præfectus, nuper ærarij opulentissimi
& verè regij Quæstor, hic ille ad res magnas natus, per-
functus magnis, & maioribus maturus, omnem fastum
exuere, cunctis subesse, nulli imperare, & quasi nouellus
tiro repuerascere propter Christum. Nullum erat tam
vile abiectumque domi obsequium, cui non se prom-
ptum offerret, quodque non hilaris capefferet, veluti in
eo natus atque educatus. Verùm ad Damascenum re-
deamus. Quod in illo illustrius Christianæ Philoso-
phiæ monumentum reperiri potuit hoc facinore, quo *in*
singulis monachorum cellis sordium domunculas expur-
gavit? Hinc grauissimorum virorum, sanctissimorum-
que Patrum exclamationes: *Illas manus inquinare cœpit,*
quæ multis ante à aromaticis odoribus fragrabant: dexte-
ramq; illam à Christo medicatam, luto & stercore con-
sperxit. O miram viri demissionem! Hæc Damascenus
fecit, hæc Del-rio. Neque enim erubuit, neque exhortuit
eam corporis egeriem scopis euerrere, sportis efferre,
quam

In vitâ
Damasceni.

quam emunctæ scilicet naris homunciones, qui in foricis non ita pridem nati atque educati, si nominari solum audirent, putidè mox excrearent; imò & probra euomerēt, & in hominès maledicta, & in Deum contumelias. Sed qui cum Apostolo *stulti propter Christum*, hæc dum legunt, illorum virorum admirantur virtutes, & vtili quadam æmulatione stimulantur ad eorum gesta suis factis adumbranda. Neque enim potest cælo esse dignus, nisi qui seipsum odio persequens, & quasi à corpore seducens, aliorum tendit, quam vanissimorum hominum turba; quorum illud est, IESV CHRISTI stabulum exhorrescere, & de Herodis culinâ fumos captare. Verum ad Del-rio reuertamur.

Post biennium in Religionis tirocinio collocatum, multaque & egregia virtutum exempla consecrans suis ad imitandum relicta, aliud quoddam tirocinium ingreditur. Cum enim Parisijs ad moralem Philosophiam omnes cogitationes contentionesque suas alligasset; ac disserendi subtiliùs facultatem, eamque, quæ de naturâ spinosius disceptat, quæque de Deo, de summis rerum generibus, de vniuersis, lateque imperitantibus disciplinarum pronuntiatis commentatur, minùs emucleatè pertractasset; consultum moderatores iudicarunt, iterum manipulares inter adscribere iam pridem emeritum. Nec verbo quidem reluctari Del-rio: sed tot claris magistratibus, tantâ scientiarum varietate ad miraculum conspicuus; post doctissimos libros in lucem editos, post adeptam in Iurè lauream, post scriptos legum commentarios, vix litterarum rerumque gestarum gloriâ florentissimus, trigesimum secundum an-

PHILOSOPHIAE
CURRICULVM
EMETITVR.

num ætatis agens, cum pueris atque adolescentibus inter aculeata Dialecticorum vepreta luctari non erubuit, & quasi ad palmam sollicitus anhelare. Vtinam hæc legerent, vtinam spectassent coram, qui nuper eum vocitarunt *virum nimis gloriosum, & nimis superciliosum*! In hoc Philosophiæ cursu triennium desudauit: in quem Narcissuli nostri & Hyacinthuli vix pedem inferunt, quin referre studeant. Hinc apud parentes putidè ratio-
cinantur, nihil Philosophiæ salebras ad sacra Iurispru-
dentia & Theologiæ templa ascendentibus prodesse, re-
morari potius; oleum & operam se perdere; tempus pre-
tiosissimam possessionem profligare; hoc interim mo-
lientes vnicè, vt

— *custos purpura cedat:*
& — *candidus umbo*

Totâ impunè sinat oculos sparsisse suburrâ:

frenum subire impatientes, seiplos regere impotentes. His tamen pupis aurem præbent egregij patres, bullâ digni & loro. Demus enim in Philosophiâ non omnes primas obtinere, demus eiusdem intima abditissimaque scita ac decreta non omnes intelligere, non omnes iis in-
digere; exercetur tamen omnium ingenium, acuitur iu-
diciû ad argumentorum Gordios nodos in Iurispru-
dentiâ, in Theologiâ, aut soluendos, aut ferro præsecan-
dos: quibus miselli illi capti intricatiq; dum tenentur,
vt simia olim in fabulis, lautam omnibus segetem exhi-
bent cachinnorum: domum verò cùm reuertuntur, ex
hoc mustaceo non lauro sed hederâ coronati, non Iuris-
consulti sed Bacchuli, quorum lacertis Respublica niti
deberet, hos nutricum humeris ferri necessum est.

Del-rio noster triennium hoc cùm exegisset, in Belgicam terrestri itinere se recipit, cetero feliciter, nisi quod Burdigalę morbus iniectâ velut manu eũ coëgit subsistere, vt in acerrimis cruciatibus suę tolerantię rudimenta perdiceret, atq. exercitam instructamque semper haberet. Hic dum lecto iacet afflictus, nuntium ex Lusitaniâ accipit, de patris sui ex hac vitâ discessu, qui tunc Olyssipone Regierat à consiliis, post filci regij in Belgio Præfecturam. Is aliquot ante mortem annis, adeò naturę viribus, omniq. vigore destitutus erat, vt infantum more ad tattam & mammam redire cogeretur, & nutricis vbera fugere. Tulit ille parentis mortē Philosophicâ, imò Christianâ mente, & quâuis eum eximiâ semper pietate ac veneratione profecutus esset viuentem, mortuum sanè nullis nœniis prosequendum iudicauit: sciebat hunc orbem peregrinam esse regionem; corpus carcerem; cælum verò domicilium: huc eum peruenisse sperabat, se breui subsecuturum. Valetudini redditus, iter intendit. Quo confecto, partim Louanij, partim Moguntię, Sacrarum litterarum studio & cognoscendis Theologorum consulis omnem operam atque industriam consecrauit.

Anno c15.
15. LXXIV.

PARENTIS
MORS.

THEOLOGIAM
AGGREGATIONE
TVR.

PHILOSOPHIAM
DOCEAT.

Anno deinde c15. 15. xcix. Duaci Philosophorum familiam duxit, summâ ingenij laude; & accuratissimis dictatis discipulos, quibus discendi ardor ac studium erat, in sui admirationem pelliciens. Præclarum sanè argumentum modestię, sinceri que iudicij, circa Philosophicas disceptationes (quod vtinam amplectantur omnes) in Epistolâ quadam ad discipulum anno c15. 15. xci. scriptâ Leodij hîc iuuat describere: *Non tam quid subtiliter, quàm quid solide & verè, attendatis.*

dat is. Dico expertus: multa ad adspectum primum acuta; quæ tempus & ætatis maturitas, & doctrinæ accessio postea discutit & excutit. Nec tam quid defendi possit, (quid enim in Philosophicis istis altercationibus non litigiosum? quid quod ab ingenio mediocri neque at pertinaciâ tueri? quod non solui utcumque possit, & si non dissoluitur, quod non ad campana disceptationem soluentis pulsum quæat extrahi verbis clamoribusq;) quàm quid grauioribus scriptoribus (quorum mihi primus Princepsq; D. ille Aquinas) placuerit. Nouitas omnis periculi plena. mihi non omnia antiquorum dicta Prænestina sortes: veriora tamen pleraque comperior, quàm hac nouitia.

MORALEM
THEOLO-
GIAM DO-
CET.

*Duaci non diu substitit: Leodicum enim conscientia iura interpretaturus subito euocatus est: quo in munere quantâ diligentia versatus sit, quantaque religione Dei vnus gloriam præ oculis habuerit, in Epistolâ ad H. Rosweydem velut solis radiis exaratum licet intueri: *Vin' & de me aliquid? firmâ sic satis fruor valetudine, doceo Moralem Theologiam, breui eâ quæ de Censuris est absoluam, hoc spero mense: intra triduum certè explicationem casuum bullæ Cœnæ Domini auspicabor, si Deo placuerit. post Iustitiæ & Iniustitiæ aquor ingens, equo, ut ille ait, ligneo arandum. Fallor. anserino dicere volebam, & lingulâ. auditores domestici octo: externi quot? pollice dempto quot in reliquâ manu Digitij fratres; idq; cum plurimi: sæpè, dumtaxat vnus, singularius. Quid mea? equalis labor æquabit mercedem. An non hæc potiora illius Philosophi humili in speciem, sed vanâ aliàs linguâ? Satis, inquit, mihi sunt pauci, satis est vnus, satis est nullus: cum tamen is esset, cui nihil erat satis, gloria ancillariolus.**

Sen. ep. 7.

Nullum

Nullum magis eximium opus, totius vitæ ambitu, nihil magis industriè, magis feliciter videtur peregrisse, quàm singulare illud, & paucis cognitum facinus, dignum æternâ prædicatione, quo I. Lipsium, V. C. omni inuidiâ & æmulatione superiorem, ad partes nostras (id est, Ecclesiæ & Dei) non timidè aut ignauè, sed palàm inter multorum circumlatrantium canum rictus, inter leonum rugitus defendendas adduxit; illique fuit, quod Ambrosius Augustino. Dabitis veniam, religiosi manes, qui nuper inter has etiam opinionum tenebras Deum mente comitabamini, qui nunc illum in luce omnis sapientiæ beatitatisque complectimini, quantum hominibus Deum complecti fas est, si ad vtriusque vestrûm gloriam eas litteras proferam, quas orbi profuturas iudicaui vniuerso. Hæ sunt Lipsij ad Delrionem; quorum adhuc autographum superest: syllabatum exhibebo.

REVERENDE PATER:

A Mor noster vetus & verus non permittit ut te ce-
lem facinus grande, quod patraui. Dei benignitate
eripui me è laqueis, quibus implicabar, & saluus atque
incolumis perueni in Germaniam ad Patres vestros.
Mentior, saluus. Aeger perueni, & pressus pondere pec-
catorum. Sed Dei misericordia, ope Patrum, illis quoque
me liberauit, & hoc unum superest ut perseuerem in bonâ
viâ, & firmo eam pede calcem. Iuua ô me tuis precibus.
tu, inquam, qui ad hanc me in parte duxisti, post cuius sa-
lutaris litteras Deum iterum iratum habeam, si um-
quam conquieui. Nocte & die me fodit ille stimulus, nec
ipse somnus mihi nisi per insomnia inquietus. Deo gratia
D esto,

esto, qui inuitum quasi & reluctantem sic eduxit, & posuit in locis ubi mihi, Ecclesia, & resp. possum esse utilis. quod serio recipio me (illo adiuvante) facturum. Sum nunc apud Patres Moguntiaci, & inter primas curas habui, ut hac paucula ad te exararem. Latere frater, qui verè fratrem & amicum recepisti, & ignosce omnia praterita, ita Deus tibi quoque ignoscat. Precibus tuis & Patris Orani me commendo serio, serio. quem participem facere huius nuntiipotes, sed solum. Nam diuulgari non expedit, quia uxor, familia, & rescule mea etiam nunc sunt apud Hollandos. Breui eripiam, & palam bonis mereddam. Ora, ora pro me. Moguntiaci, XIV. April. ∞. IO. XCI.

Nunc demum tuus verè frater

I. Lipsius.

Quid hæc contra illi rabulæ & blatterones, qui fucum detergere, & personam Lipsio decutere minantur? Volunt plura? in Epist. ad Ludouicum Thouardum anno cIO. IO. xci. cum traduci se & sui absentis nomen velligari audisset, illudque spargi, minùs sincerâ candidaque mente nomen dedisse Romanæ Ecclesiæ, sic exclamat: Deus fulmine suo me perdat (cogor enim aliquid pro affectu ardentius dicere) si est aut fuit in totâ hac actione meâ aliquid simulatum. & omitto Deum omni-scientem illum iudicem, & omnia vindicantem: apud homines ipsos ita prostituam meam famam, ut palam ita proditor sim & audiam? Qui aliquid sinceri iudicij adfert, & oculo non iniquo intuetur meam causam, videbit ne posse quidem me aliter ambulare quàm pede recto. Quod feci, quod facio, quod faciam, securus de humanis iudiciis, quibus in malignam sententiam ego quidem non sum causâ.

Hæc

Hæc pro Lipsio, cùm de Del-rio agimus: facillè enim amicus amico, vbi res postulat, decedit vrbanè de viâ. In quam vt ego redeam, ecce eruditissimam Del-rio epistolam, quâ Lipsij litteris respondet, quas protulimus.

VIR CLARISSIME:

Pax Christi, &c. * Εὐχαρις δὲ. *Facinus præclarum, di-* ^{* Bene ha-}
gnum viro, sapiente, Christiano. Latari me dicam? ^{bet.}
triumpho. Beavit me prorsus epistola tua, quam Mo-
guntiaci scriptam XIII. April. recepi Kal. Mal. Digi-
tum agnosco Dei. non aliter potuisses tam valida, tam
multa vincula disrumpere. Eduxit Angelus Domini ex
Gomorrhâ. quid ni sic vocem eam, cuius facta nominis
originationi tam bellè respondent? eduxit finibus, quibus
diuina non deerit ultio; & tarditatem grauitate compen-
sabit. eduxit dicens; Salua animam tuam. Audiuisti? sed
& illud audi; Noli respicere post tergum, nec stes in omni
circâ regione: sed in monte saluum te fac, ne & tu simul
pereas. Non peribis, nisi respicias. Memores (inquit Sa-
lus nostra) estote uxoris Loth. non credidit stulta monenti,
respexit post se, & versa est in statuam salis. sibi inutiles,
& infecunda meriti; utilis aliis, & qua sapientiam pru-
dentiamq; nobis, qua condiantur salianturq; actiones no-
stra, prabeat. Memineris constantis perseverantia. dimi-
dium facti, sic cæpisse; sed irritum, nisi telam pertexas.
Respexit te paternus ille oculus, tu tantùm in illum Solem,
qui illuxit, non retrò. Non diffido, sed amans metuo secu-
ra. Natus in corde tuo IESVS; fuge Herodem ne paruulum
ac tenellum opprimat. serpens calcaneo insidiabitur: caput
contere. caue falsorum amicorum subseffas. Epicharmi

*illud in corde tibi, Non temerè credere. Amicitiam prae-
 xent, & pulcra nomina Hospitij, Professionis, Hono-
 rum, Opum. vana partim haec, partim falsa; pernicioſa
 omnia, quia in mortem veram perducent. quid ſi non per-
 ducerent in illam aeternam? non tutus reditus, unde tam
 intuitus exitus. Dolos illorum, & vindicta appetentiam
 tibi propone. Multa manent aspera: perage, quaeso, te-
 cum animo prius. Quid asperum, quod ad animae vitam,
 qua ſola vitalis? Praepara cor ad tentationem. dictum id,
 omni, ex diuerticulis, ad viam redeunti. Ringentur, fre-
 ment, cuncta molientur, non Albionci modò, ſed &
 deſpecti illi Hospites: de quibus tamen ita meritum te ſci-
 mus, ut tuis iniqui eſſe non debeant. ſed noſti Neptuni
 filiorum indolem; imitantur cognatum elementum, pel-
 lax, ſauum, turbulentum, inſidum. Sed, arcam Noëi in-
 greſſo, diluuium contemnendum. Sine Paſiphaëſ & Tau-
 ri biſiformem ſætum (utinam ô tu Minos tandem exper-
 giſcare ut ſerio ſerò adulterij huius pœnas exigas, & pra-
 reptæ uxoris indignitate moueâre, ut decet!) vanis cor-
 nua ventis iactare,*

Πολλὰ μάτην κερδέσιν ἐς ἡμέα θυμήσαντα.

*quàm egregiè Atticus ille, reip. vtilia meditans, aduerſa-
 rios bonorum contemnit:*

Πρὸς ταῦτα Κλέων καὶ παλαμάδω,

Καὶ πᾶν ἐπ' ἐμοὶ τελευτῶ.

Τὸ γὰρ θ' μετ' ἐμῶ, καὶ τὸ δίκαιον

εὐμαχον ἔσαι.

*hæc tibi lorica trilex, hoc robur & æs triplex tuo pectori, hoc
 in cæptâ viâ filum Ariadnæ. Quo fuiſti lentior, hoc nunc,
 obſecro, propoſiti ſis tenacior. nihil durum, ſi duras. nihil
 ſerum,*

*serum, si serium. Augustinum adspice: quamdiu reluctatus? vas electionis intueri Paulum: ictus, territus, profratus sapit. postea, qualis uterque athleta? quas hostium strages dedere? quid illos à Christi caritate potuit separare? In te, mi Lipsi, Deus multa congegit ingenij, iudicij, eruditionis, & eloquentia dona: sed dona accepisti, non ut abutare ad ambitionem aut inanis glorie auram fallacem; sed ut utare ad gloriam Dei, ad Ecclesie sponsa Christi ornamentum, ad reip. defensionem, ad proximi utilitatem, ad tuam salutem. posuit in hisce locis; imò genuit, & peperit de nouo in nouam lucem & vitam gratia. Αχαι-
 sia nobis fugienda in tam bonum, tam patientem, tam misericordem, tam liberalem; quòd induxerit, eduxerit, perduxerit. nihil hìc meum agnosco: illi laus, illi gloria; qui solus laudabilis, solus gloriosus. illi gratias referamus; ego quidem ut tuo, sic meo agam nomine continuas: obsecro, quod petis, installo precibus, urgebo sacrificiis, suum ut beneficium tueatur. illi te debeo: quòd receperim fratrem, qui perierat; rediuiuum, qui interierat; surgentem, qui ceciderat; firmum saltem & constantem, qui nutabat, & claudicabat. Agnoscis ipse, & quia agnoscis, nosco saluū. Quem pœnitet peccasse, pœnè est innocens: illi sanè, qui ferit, ut sanet; increpat, ut reparet; mortificat, ut viuificet. Ab illo nobis venia petenda. Molestum sanè, molestum mihi, quod addis; cum praterita petis, ego ut homuncio ignoscam. Quis ego, ut offendi me, à te praesertim, existimare debeam? qua tu me in re vel offendiisti, vel offendere potuisti? numquam id censui, neque amicitia vinculum abrui: si quid nonnulli de me aliter tibi, noli credere. Suspicor, quid suspicere. aculeata quadam in me tua, in scriptis*

nonnullis. strinxere cutem, sed cutem, nil amplius. erant de aliis aliqua, erant in alios, aut ad alios minus cauta, qua maluisssem in lituris, quàm in litteris: erant qua multis, & mihi ex multis uni, displicebant, fortè meritò; sed nonne hæc poterant emendari, & qua data partibus, apud meliores in melius commutari? Ad Plantinum (cuius anima sit optimè) ante biennium miseram Syntagma Latina Tragædiæ, in quo nouus in illas decem Tragædias commentarius, & in fragmenta ceterorum opinationes, aliaq, nonnulla; erant in iis quedam non prorsus exarmata, asperiora fortassis, quàm ut mollicelli quidam putabant oportere; erant seuera in sectam illam seueram; præfractos illos & hispidos, qui poteram leniter demulcere? si in rosâ collocasssem, verebar ne cū barbato illo Cynico calcarent. & mihi crede, quicquid ibi mordacius, non in te, sed in tua quedam, quibus Porticum nimis animosè tuebare. Non ut offenderem amicum: sed ut adolescentulos ab illâ lue auerterem; quorum iam plerosque non duci, sed rapi videbam. phaleris Chrysippeis. Sed nec illa (benè sit Moreto, qui dum fidem mihi à socero paullo ante obitum per litteras datam, de excudendis Cothurnatis illis naniis, prestare differt; causa fuit cur nondum earum quidquam in vulgus) prodire ad manus hominum; nec tam citò, ut scit P. Oranus, proditura; nec proditura, nisi à te visa, & approbata: (non id mihi negabis, si amicus) & si verum amamus, quid ista, nisi nuge, nuge nugacissima? non placeat mihi, qui propter litterarias dissensiones, minus amici semel amicis. fui amicus, sum, ero dum ero. Poteras itaque satisfactionem prætermittere. Sed siue quid fuit exulcerationis, siue non fuit, sincerè & verè dūmus. Curemus,

mus, ut qui dissidium quarebant (si apud te aliqui, nam apud me nullus) amicitia & officia intelligant omissa per temporis iniuriam; amorem, quaque hunc fouet opinionem, altiores animo radices egisse, quam ut leuiculis susurronum flabris potuerint reuelli. Deinceps, si vis & vacat, commercium epistolicum spondeo, de studiis, litteris, officiis, iocis, seriis; non gnatonicum, aut fumi fucive vendulum, sed candidum, liberum, amicum. Si quid interea possum tuam causam, vno dicam verbo, impera ut amico, ut fratri. Si huc ad nos, quo nihil mihi futurum iucundius, neque optatius; non falles spem meam, & Pet. Orani, & Dominici Lam-
psonij, amicorum auidè te expectantium. Multa mihi nec parua, nec leuia, quae in rem tuam tecum malim coram. Salutat te P. Ioannes Oranus hodie Aquisgranum valetudinis causam profectus, inde cogitat Spadanos fontes. si & eò tu, iniurius nisi porro inde huc ad nos. Salue mi Lipsi, salue frater, saluum aduenisse gaudeo, erune ut saluum videam, & amplectar gaudens, quem depositum luxeram amarissimè? Leodij 11. Maij. clò. 10. xci.

Tuus in Christo,

Martinus Ant. Delrius.

Hanc Epistolam cum recepisset V. C. I. Lipsius sic alteras exorditur: *Vtrum tu epistolas ad me an thesauros mittis? reuera tales sunt, vberes salutarium imò & cal-* Anno m.
10 xci.
Kalendis
ipsis Iunij.
stium praeceptorum. Mihi crede, mi frater, spiritus ab alto est, qui talia tibi dictat. Tanta deinceps necessitudo, & sacra velut propinquitas vtrumque coniunxit, ut fratris se inuicem nomine salutarent: tanta Lipsij in Delrium, tamque ingenua obseruatio ac reuerentia, ut eum, quasi vitae moderatorem, scriptorumque suorum censorem adsci-

adsciuerit: quod pluribus iussit testatum litteris. Ut omit-
tantur ceteræ, epistolam xcv. Cent. I. ad Belgas à limine
visamus, quam ad eum scribit, dum Græcium abisset:
Falsus, inquit, sum in tuo discessu. Doliturum me in ab-
sentiâ sciebam: sic doliturum nulla opinio fuit sed res con-
docefecit. serio, destitutus mihi videor: de scriptis & inge-
nio etiam loquor,

— *labat incerto mihi limite cursus*

Te sine, & orbat & caligant vela carina.

Non auribus ea Lipsius, sed veritati dedit. Dolebat virum
abiisse, qui nec Timonis allia, nec Diogenis oleret nastur-
cia, multò minùs Epicurei delicias hortuli; sed frugale
Lyceum. Qui nihil, inquam, in scriptis aliorum inuidè,
nihil adulatoriè censeret. Talem sibi ereptum etiam
apud familiares suos, ac imprimis Balthasarem More-
tum, deslebat; qualem vix vnum reperias inter tot censo-
rum Gargara. Hisce frustum addo non insipidum ex
Delrionis ad Rosweydam, quibus mutuum in V. C.
amorem toto pandit sinu, non eum, qui in labiis hospita-
tur, sed qui in pectore penitisque fibris ac medullis. Scri-
ptæ sunt, cum primùm ille Leodicum peruenisset ex Ba-
tauiâ, & noster intellexisset, nescio quid, de libellis qui-
busdam eius in publicum edi vendique prohibitis. *Amas*
me? (verba sunt Delrionis ad Rosweydam) *Serio, sedulo*
inquire, qui vendi prohibiti libri: & quid in his, quod im-
probet, annota, & ad me perscribe. Calidè istud peto, quia
Lipsium calidè amo. Si quid in eius scriptis, quod in su-
spectionem bonis venit; statuit explicare, vel tollere. Sentit
apertè nunc cum Ecclesiâ, quod semper clam sensit. animo
fuit inter malè sentientes numquam, corpore tantum. Ille

me

me sibi ad conscientia res Iudicem delegit. Hæc diductius nonnihil referenda fuerunt, vt viris huius æui doctissimis coniunctissimisque suæ societatis in litteris exponendis, in virtutibus excolendis, fructus non emarcesceret, aut liuido pestiferoque dente attereretur.

Annis iisdem, quibus Leodici versatus est, orationes FLORIDA
plerasque contexuit, quas cùm ibidem ad Partheniorum MARIA-
Sodalium coronam pronuntiaffet, anno deinde c. l. b. Io.
xcvii. typis mandauit imprimēdas, & inter *Florida Mariana* recensuit. Quæ cùm illius in Theologicis rebus primordia sint operū, & à plerisq. pingui Minervâ, vt hominum iudicia sunt, dicerentur conscripta, ac quasi leuidēso contextu, de stylo suo præfari necessarium habuit. Pauca dabo de multis. *Scriptio & character, nisi fallor, titulo* STYLVS.
consentanea, & auctori. Hic se Theologia saltē candidatum, non litteratorem esse meminerat: & cùm ista diceret, non Rhetorem agebat, aut Grammaticum; sed eam sacra sapientia partem, quæ de vitæ Christianæ officiis dis-
ferit, ipsam quoque Scripturam sacram publice profitebatur. Quis ergo iure damnarit, si Christianus, quàm Ciceronianus maluit audire? si Cyprianum, Hieronymum, Pacianum, Ambrosium, nonnumquam & cum Tertul-
liano atque Arnobio Sidonium & Alhelmum, quàm cum Cicerone & Terentio Paganos alios in hortulis suis maluit spirare? Meâ quidem sententiâ non rectè, nec prudenter faciunt, qui vno Tullio cuncta metiuntur, & ipsi quoque Socrati Sicyonia inducunt. Placet Juris-
consultus cum Alphenō, Scauolâ, & Papiniano loquens. Placet Medicus, cuius Latinitas Musam, Largum, & Celsum sapit. Placet Orator, qui Ciceronem; Declama-
E tor,

tor, qui Fabium & Senecam; Historicus, qui Sallustium, Casarem, Tacitum; Poëta, qui in Epicis Virgilium, in Lyricis Horatium, in Elegis Tibullum & Propertium, in Orchestrâ Cordubensem nostrum imitatur. Est suus cuique materia & scriptioni genius, est peculiaris quidam character. Qui cōfundunt; nōne per similes ijs, qui eūdem à milite & rustico, ab equite & pedite gradus & incessus modum postulent? Hæc & his plura non immeritò, nec inficetè. Fuēre enim non pauci, qui, vt Attilium Lucilius, ferreum eum scriptorem nominarent; alij, qui ferrumina- torem, vt Hermolaum Barbarum Bartholomæus Scalæ; alij aliter. Studebat sanè verborum proprietati, nec trita semper viâ incedebat, sed arduam potiùs dictionis orbitam sectabatur; aut inter salebras interdum, si dictionis nervi ac lacerti id postularent, noua premebat vestigia: malebat positus in abrupto castris vel disputando veritatem propugnare, vel exhortando auditorum animos expugnare, quàm in molli solo, eneruataque deliciis valle, sine fructu, sæpè cum dispendio luxuriari: & hanc laudem sibi vsurpare nitebatur, castigatè vt diceret, & doctioribus potiùs placeret, quàm indoctoribus vilesceret. Nam solent plerumque, nescio quo fastidio malè nau- seantis stomachi, homines minùs sobrij carpere eos qui editoribus insistent, & illustria prosequuntur; & carpere item, qui prona ac familiaria: nec medium iudicare quidquam, nisi quod nusquam sit. Quantum verò in amoenissimis Tullij viretis, & circa floridos illos labentium modulato cum susurro riuulorum margines, in pueritiâ oblectatus fuerit; docent eæ litteræ, quas ad Granuellanum, ad Parentem suum, ad Ludouicum Delrionem, Solino,

Solino, Claudiano, Senecæ præfixit: quæ nisi stylo scriptæ sunt Ciceroniano, paucos eo nomine censendos dixeris. Verùm cum desertis illis siluulis profanisque myrteris, frugifera inter Patrum pomaria obambulare assiduus; ut iis qui in sole versantur accidere solet, alium ab eorum calore colorem duxit, & lacteam illam molliculamque cutem virili more infuscauit: fortior, si non venustior.

Iam triennium apud Eburones Moralem Theologiam professus erat, cum Tornacum se conferre iubetur: ut ex legibus, quibus voto se obligarat, nonnihil temporis ad quietem sacrasque commentationes & exercitationes à studiorum tumultibus subduceret; atque, quod Seneca suadet, *se sibi vindicaret*. Hic iterum Philosophum Theologumque exuere, & inter tirones quasi tiro proiectissima quæque munia ambire: lacerâ interdum & squalidâ lacernâ indutus œconomum comitabatur, & quæ ille in foro emerat, per mediâ urbem spectante omni populo ad collegium deferbat senatorius & censorius baiulus, aliis admirantibus, aliis vicissim illudentibus. Inter hæc animo efferebatur, cum in memoriam reuocaret, idè se & fasces & purpuram deseruisse, ut hîc summo Regi simillimus, in cælo proximus esset: tanti sibi esse & maioris illud, non iam Pythagoricum, sed Christianum, * *ἐπεὶ Θεῶν*. Vnum id præ reliquis domestici stupebant omnes, tantum virum oculis caligantibus, & pænè cæcutientibus, gnauiter & prompto libentique animo, dum alij mensæ assiderent, stantem, aut in loco anagnostæ solito incommodè sedentem, librum aliquem pium de more prælegere, & ad alterius arbi-

TORNACI
INTER
TIRONES
EXERCITVR.

* Sequere
Deum.

trium accentus & tonos vel inuertere, vel dirigere. Quod quidem quanti sit, norunt illi præsertim, qui in religiosis familiis degunt, & huiusmodi se exercitiis subigunt.

LOVANI
SACRAS
LITTERAS
EXPLI-
CAT.

Annus in hisce fluxerat: iterum Louanium profectio-
nem adornare cogitur, vt Sacras publicè litteras inter-
pretetur. Hic dum esset, omne tempus, quod à docendi
munere supererat, colligere, & posteritati imputare: nihil
oculis quidem suis indulgere; quibus, seu ex lampadum
lucernarumve fuligine, seu ex humoribus per laborem
excitis, & continuo scaturientibus, priuandum mina-
bantur medicæ chirurgicæque peritiores. De Magiâ la-
tius differendi opportunitas cum se obtulisset, huiusce
rei necessitatem perpendens, eam arripuit ansam, & in
hunc locum euagatus est. Non poterat enim secundum
pectus, & diuini ardens honoris zelo, manum de tabulâ
tollere. Itaque cum in hunc locum diuticulè euagatus
esset, concilium cepit libros de Magiâ conscribendi, opus
certè, ad quod construendum omnes artes desudasse vi-
dentur & disciplinæ. Quod nec ipsi quidem veritatis
perduelles hæretici inficias iuerunt. Clamare tamen con-
tra, an oncare potius cœperunt, quin imò eiulare, lamen-
tari, quòd inter Stryges & Telchinas de viciniâ vapu-
larent. Dederant occasionem ferulam vibrandi seuerius
nonnulli, qui illotis pedibus se immergebant in sacro-
rum penetralia, & ibi dominari volebant, vbi ius ipsis
nullum. Proscribebantur Theologorum Principes: ir-
ruebant in eorum possessiones nepotuli nescio qui, & in
litteratorum senatu suffragium sibi arrogabāt proletarij,
& capite censi. Agitabat horum plerosque hæreseos fera-
le quoddam hippomanes, alios incitabat scribendi ca-
coëthes:

DISQVI-
SITIONES
MAGICAE

coëthes: & erant, qui œstro perciti in omnes ferebantur, & nullius ferebāt occursum: iamq̃. latiùs hæc pestis graf-
fabatur. Quid faceret? Non tulit hoc Del-rio, vir *es refel-
lere sine pertinaciâ, es refelli sine iracundiâ paratus*. Qua-
re, vt erat solers; explorare adnissus vbi vlcus suppuraret:
tum sale & aceto ibidem perfricare, scalpellum aduocare,
ignem admouere: ingenuè, quæ probāda forent, probare;
quæ refellenda, refellere; figere quandoque dentem, non
liuidum, sed amicum. Pupugit virum politionum artium
scientissimum, magni patris sobolem, verùm animi con-
citatione, & temeritate quadam iudicandi abruptè ni-
mium quantum præcipitem. Vtinam ille Lipsium imita-
ri, & patronum experiri voluisset, quem sensit aduersa-
rium! Inuidit hoc bonum hæresis ferox & immanissima
hyæna. Nemo interim mirari debet, si Del-rio aliquan-
tum lautius solito hos sæcutinos ad balnea & thermas
defricauerit. tantam enim illi nauseam iam pridem omni-
bus excitabant, vt ferre posset nemo; & non pauci strigi-
lem acuerent. Est viri prudentis, quantumcumque mitis,

* *Ἀγνεῦσαι δ' ἀκοὰς βλασφημοσύνης ἀλεγεινῆς:*

* *Puras ha-
bere aures
à molestis
calumniis.*

& acerrimum calumniæ morsum, ac Medij cicatricem
euitare, si possit, si non possit, obducere. Hac tamen in re
aliter, quàm plerique opinantur, se gessit: potius enim cis
metam constitit, quàm ultra prouectus est. Quam mo-
destiam vir omnium modestissimus Iustus Lipsius pro
familiaritate mutuâ in eo reprehendit, tamquam torpo-
rem nimis remissum. Erat ei, non nego, vti & I. Lipsio;
vibrans quædam & amentata dictio, cum rerum æquita-
te fretus, & iustitiæ Dei quæ amore impulsus, stylum co-
ruscaret; non conuiciis & maledictis medicata, verùm

acie suâ penetrabilis; nec qualis ex plastro histriorum, & mimorum, sed quæ Philosophorum exedris digna; magis salutaris, quàm vendibilis: denique quæ omnibus prodesse vellet, obesse nulli: quamque velut gladium in vaginâ continebat, & non nisi ad inculpatam tutelam stringebat; non tam sui, quàm veritatis. Nec illud quicquam improbat, nisi qui suæ improbitatis conscius, medicorum ferro cùm nolit sanari, mauult adulatorum vngue scabi & titillari. Licuit, semperque licebit, vel sui defendendi causâ, vel aliis opitulandi, ferrum eudere; etiam litterarium. Hoc Delrius in *Magicis disquisitionibus* fecit: fecit quod licuit. Eos tamen commentarios non tunc edidit, quando conscripsit, sed triennio permisit maturescere: nec eo contentus, aliquot iterum post annis, hoc opus putare, imò rigare potius cœpit: adiecit plurima, direxit pauca; & anno cld. lcc. v. Moguntia, anno cld. lcc. viii. Lugduni permisit in lucem prodire illustrius & exaggeratius.

HISPANIA
COGITAT.

Hæc sunt quæ Louanij partim inchoauit, partim ad vmbilicum perduxit; vsque ad annum cld. lcc. xcvi. Hoc enim anno, cùm *Florida Mariana* nobili clarissimoque viro Carolo Billeo inscripta velut amoris tesseram reliquisset, Moderatorum ductu Hispaniam cogitauit; sed cogitauit tantum. Cùm enim in portu Iccio ventorum tempestate, vitæ periculum adiisset: nec spes foret prædonibus circum grassantibus, valetudine non minùs, quàm auræ improbitate cælique pertinaciâ renitente, eum in Hispaniam appellì incolumem posse; Leodicum repetijt: ad quem tum Lipsius amoris indices litteras dedit, quas rei huiusce commemorandæ causâ partim at-

texam.

texam. *Iam nuntuas vidi, sed egone ut sileam in tanto meo gaudio pariter & dolore? Dolui, dolui tuos casus,*

— *dura navis,*

Dura fuga mala, dura belli.

Omnia conspirarunt in te, sed pro nobis: certè prome; qui te ubicumque retineo & animi sinu inuoluo. sed propiorem malo, & sæpius aut litteris aut aspectu etiam frui. Quis vel hunc mihi eripiat, cum in Belgicâ es? adibo & repetiam te, ubi ubi locorum eris.

Hæsit Leodici non multis mensibus. Inde enim (siue Lipsij desiderio, siue consilio, seu quâ aliâ opportunitate, & studiorum, ut reor, maximè; quorum in eâ Academiâ commercium, & cum aliis facilius, uti in litterarum emporio, & cum Lipsio iucundissimum erat futurum) rursus Louanium commigravit. ubi præter Scripturæ sacratioris studium alternis septimanis concionandi munus suscepit. Dixit ad Deiparæ Sodales magno pietatis sensu, sed doctè, politè, enucleatè. Quâ in re adeò se submisit & non arroganter, ut quasi elementarius fenex, (ô gloriosum, ob Dei honorem, assumptum nomen!) sollicitè & obnixè collegij Moderatorem consuleret, quid præcipuè dicendum, aut quomodo dicendum esset; quàm diu, quàm concitatè, quàm remissè; exiliùs, an elatiùs. Nihil verò explicandum assumebat, quod non priùs ille præscripsisset. Nec veritus id palàm profiteri: sic enim ait in exordio secundæ S. Lectionis, quam speculo Mariano inseruit: *Cum eos, quibus vitæ meæ, studiorum actionumq;* SACRÆ
LECTIO-
NES. *cura fuit à Deo commissæ, & in quorum voce loquentem Deum me agnoscere par esse scio; quibus interrogarem de rebus potissimum ad vos (Sodales Parthenij) me verba*
facere

facere utilius esset; illiq; responderent, id fore si de Speculo Mariano, hoc est Deipara moribus, differerem: visus sum audire illud à Deo Prophetæ Isaia imperatum; Sume tibi librum grandem, & scribe in eo stylo hominis.

DICENDI
CONSE-
TVDO.

Cap. 84.

concionibus & illud præclarum inerat; numquam eas ex præcoce quadam & aliorum contemptrice arrogantiâ extemporales fuisse; non ex iuuenili leuitate, aut impudentiâ potiùs, parum meditas: sed quod Cicero in grauioribus, hoc Delrio in hisce piis & sacris orationibus; verbis dicam paucis, quæ Suetonius vsurpat in Augusto: Numquam dixit, *nisi meditat à & composuit à oratione, quamuis non deficeret ad subita ex temporali facultate. Ac ne periculum memoria adiret, aut in ediscendo tempus absumeret, instituit recitare omnia.* Ita cum diceret, & ea quæ dixerat politè cum perpoliret postea, anno cIo lOc. vii. Horatio Cardon euulganda permisit, & posterorum vtilitati propaganda. Hoc Dei obsequio egregiè perfunctus, dum à docendi dicendique munere otia-
tur, noluit otium suum perire: sed quasi in Caietano litore conchas & vmbilicos legeret, *Orientium* præ fenestris incommodo vlcerosum, adscitis variorum opinionibus sanitati restituit; & Notis, tâquam viatico quodam, instructum foras anno sæculari prodire concessit. Sub idem tempus, cum in Societate Iesv agendo patiendoque fortiter, verè se Religiosum comprobasset, solumnibus quatuor votis, Deo & Dei locum gerentibus publicè factis, illis nexui se æternum addixit.

ORIEN-
TIVS.

SIT DO-
CTOR
S. TH.

Hinc Grætium abiit. Quâ in yniuersitate studiorum, nuper institutâ, S. T. supremâ laureâ insignitus, diuinis iterum arcanis referandis præfectus est. Incredibili om-

nium

nium approbatione gnauiter huic rei incubuit, Serenissimis Archiducibus Austriæ carus, & honoratus inter primos. Vfus interim opportunè Germanorum chalcographiâ, in *Cantica Canticorum libros* liberè in vulgus ire iussit, magni laboris opus, & limati iudicij.

COMMENTARIUS
IN CANTICA.

Triennali rursus studio peractò, quòd Hispania omnino in votis esset, & medicorum sententiâ cæli temperies ea magis congrueret, Salmanticam petiit; atque eodem pede, quo Grætij nuper illius studium, aliorum fauor processit. Allatrauit tamen iterum nonnemo: & solennibus execrationum carminibus ac veneficiis doctissimum quemque, ac qui se scire aliquid, quod ille nesciret fecisset palam reipsa, editisque libris; in canes, belluas, pecora, scarabæos, asinos, cercopas, cercopithecus, polypos, laruas, furias, dæmonas, *μοεμολυκεία*, conuasatis subito omnibus naturæ dotibus diuinisque muneribus, imò perditis profligatisque, migrare, atque ab homine in non hominem abire cogebat. Quid ageret Del-rio, qui hîc inter alios lautissimè inuitabatur, non Lapitharum aut Centaurorum poculis, at Circæis pharmacis? Vlysses animo & mente induendum censuit, & se suosque incolumes præstandos. Tribu mouerat iste & inter ærarios nuper retulerat Dionysium Areopagitam. Intercessit noster, & *Vindicias Areopagiticæ* conscripsit; ac sanctissimum grauissimumque virum ex hac calumniarum catastâ ereptum, Ecclesiæ Catholicæ reddidit.

PROFICISCITVR
IN HISPANIAM.

VINDICIAE
AREOPAGITICAE.

Sub idem tempus Lugduni publici fecit iuris Ioannes Vignon, *Martini Antonij Delrj in C. Iulij Epitomam Historiarum emendationes*, quando aut ubi concinnatas, non satis exploratum habeo.

EMENDATIONES
IN IULII EPI-
TOMAM.

F

Sed

Sed in his per ludum quodammodò & quasi rudibus se exercens, maiora meditabatur: atque non solum quæ prius scripserat facta testâ præstare; sed alia etiâ architectari, quæ nullis obnoxia temporum iniuriis æternitati deferuissent: in omnes sacræ Scripturæ libros non facem accendere modò, sed pharum attollere, ne quis latentium in hoc Oceano ignarus saxorum, in breuia præceps rueret, & à veritatis portu deerraret. Hoc suo labore dum consultum vult omnibus, in *Genesim* lucubrationes suas palàm lucere passus est; & in Belgium iter accelerabat ut cetera conficeret, cum subitò præclarissimis eius conatibus mors immineret.

PHARVS
S. SCRIP-
TVRAE.

REDIT IN
BELGIUM.

Anno cdo. Ioc. viii. xv. Kalend. Sept. Pintiâ discedit, & terrâ marique iactatus xviii. Octobris Bruxellas peruenit. Prehensarunt hîc eum multi, atque ut tanto tamque molesto ex itinere dies aliquot quieti se daret, omnibus suppliciis extorquere conati sunt. Verùm ille, ut erat in consultando non admodum concitus, sed tenax eorum quæ consultò decreuerat, dimoueri non poterat ab eâ sententiâ, quâ se Prouinciali Præposito (qui tum Louanij esse putabatur) sistere, & illius statuerat imperiis subdere, penitusque consignare. Hoc animo Delrius, studiorum perungili perpeteq. cultu, & attritu quodam ad maciem vsque, & quasi σκελετός; adesus, exsuccus, aridus, itineris importunitate conuulsus, ætate declinui, valetudine malignâ, dum currû vehitur publico, tantos repente calculo in vieterem lapso dolores incurrit, ut superstitem Louaniam vsque comites vix pertinenturum iudicarent. Peruenit tamen serò admodum, defectis viribus, solo spiritu supra ferocissimam morbi tyrânidein animosius

emi-

emicans. Ea nocte dolor asperari; altero die medicus animo despondere: conclamatum esse. Horam circa septimam ante meridiem adest, qui conscientiiis expiandis præfectus. edicit illi iam summum adesse discrimen; à morte parum abesse: rogat, velintne mentem eluere. Tum Del-rio, nihil eo nuntio commotus, erecta mente: nihil sibi admodum esse, cui obnoxium norit: eum esse diem, cui tanto setempore in hoc sacrorum hominum cœtu parasset: sic vixisse, vt mori non timeret: velle tamen expiationis beneficium accipere, & abluere id næuorum quod superesset in IES V CHRISTI sanguine. etsi enim ille abluendis næuis quandoque necessarius non sit, esse tamen ad cælestibus quibusdam cimeliis adorandum animum, qui mox sistendus Deo. Id agitur. Mox augustissimum CHRISTI corpus in thalamum adfertur. Ille venerabundus ea sentire, ea dicere, quæ Deum testem & arbitrum non refugerent: quæ astantes sacro velut numine percellerent: pauca quidem ob doloris vim, sed contra vim fortia, & quæ verè Timantis essent, sed & Christiani. Iam, cælituum hospes, mox contubernalis futurus, Angelorum pane, interiori quadam gustus suauitate epulatus erat: cum eum rogat sacrorum Interpreter; ecquid censeret, an velit oleo sancto ex Iacobi decretis inungi? Ille nihil, nisi hoc vnum; Quid Rector censet, quid vult? vbi eum non abnuere intellexit: Ita, inquit, fiat; ita fiat. Vix me contineo, quin ad te, vir magne, Christo nō inuidente, dicam: *Factus es obediens usq; ad mortem.* Nihil enim aliud toto hoc tempore, nisi ex Superiorum nutu faciebat: quod ille sanciret, sanctum arbitrabatur; quod interdiceret, nefastum. Puerum cre-

deres à paternâ maternave manu trahi non reluctantem, sed hilarè blandientem. Circa idem tempus iuuenis per illustri domo ad eum officij causâ venit, & benignè virum nominis claritate notum compellans, opem operamque suam obtulit, tum Delrius: Si quidem eâ conditione essem, quâ tibi obsequium deferre possem, prolixè pro merito tuo pollicerer: nunc verò illud in cælis præstâdum differo; vbi tui non immemor breui, vt spero, futurus sum. Post hæc, veluti doloris expers, incredibili animi magnitudine naturam vincere; & de ipsâ quodammodò morte triumphare; ac soli intentus cælo, Deo plenus cetera omnia fastidire; sui securus, mortisque ex æquo nec cupiens, nec metuens; solos amplecti sodales suos, qui MARIE, qui IESV nomen, qui vtriusque fortiter patienterque gesta in memoriâ renocarent; cum his loqui, his assentiri; in Crucifixi effigiem oculos figere, Crucifixum æmulari. sic illè exactus dies est. Pòstero autem, cùm medicus fieri non posse animaduerteteret, vt tantos dolores viuo vegetoque sensu ferret, sopire eum decreuit. Hanc in rem accepto pharmaco, vsque ad horam sextam lentescere visus est doloris sensus; sed ima penetrare doloris vis. Tandem horâ septimâ, vix vllò mortis indicio, inter suorum manus placidissimè exspiravit, Anno dco. lcc. viii. Octobr. die xix. Annum agens ætatis quinquagesimum septimum.

MORS.

CORPO-
RISTOR-
MA.

Staturâ fuit mediocri, nasoque crassiore, capillo denso, eoque nigro; nisi quòd sub finem vitæ canitie venerabilis: barba item nigra. oculorum acies assiduis lucubrationibus non solum heberata, sed pænè extincta. forma erat virilis, quæque fucum non redoleret, aut molle
quip-

quippiam; sed ingenium spiraret acre viuendumque.

Inter alia virtutum decora, hanc sibi propriam habuit: nihil vafre aut subdolè moliri; non per cuniculos infidari, non per vineas oppugnare; non palàm blandiri, clàm detrudere: (quæ pestilentissima huius æui lues est) idem linguâ promptum, quod animo meditatum habere. Itaq. qui cum eo versabantur, nullas cæcas cogitationum foveas metuebant, nullos laqueos; omnibus sacris & religionibus confirmatum censebant, quod ab eo dicebatur. Quâ de causâ Lipsius in familiari ad Rosweydem epistolâ hominem eum vocat; *cui non mentiri solum nefas est, sed blandiri.*

ANIMI
CANDOR.ANNO
MD. LXXII.

Alterum illud erat: nihil eum improbè in aliquo eluare solitum, nihil malignè quidem depradicare: quidquid probum; etiamsi in venusto corpore mendæ essent; quidquid tamen in eo non illaudatum, ingenuè amplecti, efferre; & in hostibus non deterere odio aut invidiâ, in iuuenibus etiam indulgentiùs fouere. Nihil eo vquam fuit magis integrè virtuti amicum & honestati; vbicumque ea demum esset, in quocumque esset.

LIVORIS
EXPLERS.

Denique non opinionibus rapiebatur vulgi. Quare frustra ad eum deferabatur, si quis absenti eum inuicem diceret, si quis conuicium; nisi ratione dictum animaduerteteret. Tum verò reprehendentibus ne minimum quidem obluçtabatur; in nulla excusationum dumeta correpebat: ex hostibus etiam capiebat fructum, ex venenis parabat antidotum. In omnibus rationem ducem sequebatur, cetera susque deque habebat.

RATIONE
OBSERVANS.

Ereptus est rebus humanis, cum ingenti bonorum luctu. Si enim aliquantum adhuc vitæ prorogasset Deus, ea

iam conuexerat cæmenta, quibus non *pharum* solum-
modò (vt ipse vocat) exstruere potuisset, sed fortissimum
Ecclesiæ Christi propugnaculum & inuictissimam veri-
tatis acropolim, Illius sui consilij velut ichnographiam
depinxit in proloquiis, quæ tamquam vestibulum com-
mentariis in Genesim tam altè, tam longè latequæ præ-
struxit, vt si quis ex yngue leonem velit æstimare, non
hominis vnus hoc opus, sed multorum esse sæculorum
arbitrabitur, sed incredibilis illius animi magnitudo, &
prodigiosa diligentia hæc feliciter ad finem perduxisset,
nisi mors, quæ sola poterat, eius consilium demolita
foret.

Tumulatus est in templo Patrum Societatis IESV,
Louanij ad dextrum latus sacelli interioris: nullo saxo
grauantur innoxij manes, nullâ designantur tabellâ: solis
piorum votis & lacrymis decorantur: si quis volet, hæc
animo insculpat:

SVBSISTE: TANGIS TERMINVM: HIC MORS IMPERAT.

HOC DELRIONIS INDICAT TVMVLVS TIBI.

MARMOR VIDERE POSTVLAS? CÆLOS VIDE.

HOC MARMOR ILLI EST: ORBIS EST BVSTVM: LIBRI

FAVILLA: FAMA PVBLICA, EST INSCRIPTIO.

LEGE HOSPES; ET QVOD EXPRIMAS TIBI SELIGE.

BREVI EST EVNDVM: NAM HOSPES ES. QVÆRAS VIAM.

F. I. N. I. S.





